

柳河東文集

二

河東先生文集卷二

行狀

段太尉

秀實

逸事狀

太尉始為涇州刺史時。汾陽王以副元帥居蒲。王子晞為尚書。領行營節度使。寓軍邠州。縱士卒無賴。邠人偷嗜暴惡者。卒以貨竄名軍伍中。則肆志。吏不得問。日羣行。丐取於市。不嫌輒奮擊折人手足。椎釜鬲甕盎。盈道上。把臂徐去。至撞殺孕婦人。邠甯節度使白孝德。以王故。戚不敢言。太尉自州以狀白府。願計事。至則曰。天子以生人分公理。公見人被暴害。因恬然。且大亂。若何。孝德曰。願奉教。太尉曰。某為涇州甚適。少事。今不忍人無寇暴死。以亂天子邊事。公誠以都虞侯命某者。能為公已亂使公之人不得害。孝德曰。幸甚。如太尉請。既署一月。晞軍十七人。入市取酒。又以刃刺酒翁。壞釀器。酒留溝中。太尉列卒取十七人。皆斷頭。注槊上。植市門外。晞一營大譟。盡甲。孝德震恐。召太尉曰。將奈何。太尉曰。無傷也。請辭於軍。孝德使數十人從太尉。太尉盡辭去。解佩刀。選老嫗者一人持馬。至晞門下。甲者出。太尉笑且入曰。殺一老卒。何甲也。吾戴吾頭來矣。甲者愕。因諭曰。尚書固負若屬耶。副元帥固負若屬耶。奈何欲以亂敗郭氏。為白尚書。出聽我言。晞出。見太尉。太尉曰。副元帥勳塞天地。當務

始終今尚書恣卒為暴暴且亂亂天子邊欲誰歸罪罪且及副元帥今邠人惡子弟以貨竄名軍籍中殺害人如是不止幾日不大亂大亂由尚書出人皆曰尚書倚副元帥不戢士然則郭氏功名其與存者幾何言未畢晞再拜曰公幸教晞以道恩甚大願奉軍以從顧此左右曰皆解甲散還火伍中敢譁者死太尉曰吾未捕食請假設草具既食曰吾疾作願留宿門下命持馬者去旦日來還卧軍中晞不解衣戒候卒擊柝衛太尉旦俱至孝德所謝不能請改過邠州由是無禍先是太尉在涇州為營田官涇大將焦令謨取人田自占數十頃給與農曰且熟歸我半是歲大旱野無草農以告謨謨曰吾知入數而已不知旱也督責益急且饑死無以償即告太尉太尉判狀辭甚巽使人求諭謨謨盛怒召農者曰我畏段某耶何敢言我取判鋪背上以大杖擊二十垂死輿來庭中太尉大泣曰乃我困汝即自取水洗去血裂裳衣去瘡手注善藥旦夕自哺農者然後食取騎馬賣市穀代償使勿知淮西寓軍帥尹少榮剛直士也入見謨大罵曰汝誠人耶涇州野如赭人且饑死而必得穀又用大杖擊無罪者段公仁信大人也而汝不知敬令段公唯一馬賤賣市穀入汝汝又取不取凡為人傲天災犯大人擊無罪者又取仁者穀使主人出無馬汝將何以視天地尚不愧奴隸耶謨雖暴抗然聞言則大愧流汗不能食曰吾終不可以見段公一夕

自恨死。及太尉自涇州以司農徵戒其族。過岐。朱泚幸致貨幣。慎勿納。及過。泚固致大綾三百疋。太尉壻韋晤堅拒。不得命。至都。太尉怒曰。果不用吾言。晤謝曰。處賤無以拒也。太尉曰。然。終不以在吾第。以如司農治事。堂棲之。梁木上。泚反。太尉終吏以告泚。泚取視其故封識具存。

元和九年月日。永州司馬員外置同正員柳宗元。謹上史館。今之稱太尉大節者。出入以為武人。一時奮不慮死以取名天下。不知太尉之所立如是。宗元嘗出入岐周邠。縈聞過真定。北上馬嶺。歷亭鄣。堡戍。竊好問老校。退卒。能言其事。太尉為人。姁姁常低首拱手。行步言氣卑弱。未嘗以色待物。人視之。儒者也。遇不可。必達其志。決非偶然者。會州刺史崔公來。言信行直。備得太尉遺事。覆校無疑。或恐尚逸墜。未集太史氏。敢以狀私於執事。謹狀。

唐故秘書少監陳公行狀

公姓陳氏。自潁川來。隸京兆萬年。冒貴里諱京。既冠。字曰慶復。舉進士。為太子正字。咸陽尉。太常博士。左補闕。尚書膳部考功員外郎。司封郎中。給事中。秘書少監。自考功以來。凡四命。為集賢學士。德宗登遐。公病痼。輿曳就位。備哀敬之節。由是滋甚。遂以所居官致仕。貞元二十一年四月二十五日。終於安邑里妻黨之室。無子。伯兄前

監察御史璫仲兄前大理評事長以公文行之大者告於嘗吏於公者使辭而陳之大曆中公始來京師中書常舍人袞楊舍人炎讀其文驚以相視曰子雲之徒也常以兄之子妻公由是名聞遊太原太原尹喜曰重客至矣授館致餼厚以泉布獻焉公曰非是為也某遊客如雲還嘗為北都賦未就願即而就焉其宮室城郭之大河山之富關閑之壯與其土疆之所出風俗之所安王業之所由興苟得聞而觀之足矣若曰受大利是以利來蓋異前志也吾不能敢辭遂逆大河踰北山仿佯而歸賦成果傳天下為咸陽尉留府廷主文章決大事得其道為博士舉疵禮修墜典合於大中者衆焉涇人作難公徒行以出奔問官守段忠烈之死上議罷朝七日宰相曰不可方居行宮無以安天下公進曰是非宰相之言天子褒大節哀大臣天下所以安也況其特異者乎上用之其勞勤侍從謀議可否時之所賴者大巡狩告至上行罪己之道焉曰凡我執事之臣無所任罪予惟不謹於理而有是也將復前之為相者公曰天子加惠羣臣而引慝焉德至厚也而為相者復是無以大警於後且示天下率其黨爭之上變於色在列者咸恟而退公大呼曰趙需等勿退遂進而盡其辭焉不果復上迎訪太后聞數歲外頗急其禮公密疏發之天子感悅焉初禮部試士有與親戚者則附於考功莫不陰授其旨意而為進退者及公則否卓然有有司之

道不可犯也太廟闕東向之禮且久矣公自為博士補闕尚書郎給事中凡二十年勤以為請殷祭之不墜繫公之忠懇是賴故有赤紱銀魚之報焉昭陵山峻而高寢宮在其上內官懲其上下之勤輓汲之艱也謁於上請更之上下其議宰相承而諷之召官屬使如其請公曰斯太宗之志也其儉足以為法其嚴足以有奉吾敢顧其私容而替之也奏議不可上又下其議凡是公者六七人其餘皆曰更之便上獨斷焉曰京議得矣從之在集賢奏秘書官六員隸殿內而刊校益理納資為胥而仕者罷之求遺書凡增繕者乃作藝文新志制為之名曰貞元御府羣書新錄始御府有食本錢月權其贏以為膳有餘則學士與校理官頒分之學士常受三倍由公而殺其二書史之始至入禮幣錢六十緡亦皆分焉公悉致之官以理府署作書閣廣羣官之堂不取於將作少府而用大足居門下簡武官議典禮上以為能益器之與信臣議且致相位遇公有感疾使視之疾甚不能知人遂不用用鄭吏部高太常為相而以秘書命公所以示優之也公有文章若干卷深茂古老慕司馬相如揚雄之辭而其詰訓多尚書爾雅之說紀事朴實不苟悅於人世得以傳其藁其學自聖人之書以至百家諸子之言推黃炎之事涉歷代洎國朝之故實鈎引貫穿舉大苞小若太倉之蓄崇山之載浩浩乎不可知也豈楊子所謂仲尼駕說者耶夫其忠烈之褒也相府

之有誠也。太廟之東向也。昭陵之不更其故也。官守之不可奪也。立言之不可誣也。利之不苟就也。害之不苟去也。其忠類朱雲。其孝類潁考叔。廉類公儀休。而又文以文之。學以輔之。而天子以為之知。既得其道。又得其時。而不為公卿者。病也。故議者咸惜其始而哀其終焉。公之喪。凡五十四日。而夫人又沒。毀也。夫人之父曰偕。司農卿。祖曰某。贈太子太保。某故集賢吏也。得公之遺事於其家書。而授公之友。以誌公之墓。謹狀。

唐故給事中皇太子侍讀陸文通先生墓表

孔子作春秋。千五百年。以名為傳者五家。今用其三焉。東皐牘。焦思慮。以為論注。疏說者百千人矣。攻訐狠怒。以辭氣相擊。排冒沒者。其為書處則充棟宇。出則汗牛馬。或合而隱。或乖而顯。後之學者。窮老盡氣。左視右顧。莫得而本。則專其所學。以訾其所異。黨枯竹護朽骨。以至於父子傷夷。君臣詆悖者。前世多有之。甚矣聖人之難知也。有吳郡人陸先生。質與其師友天水啖助。洎趙匡。能知聖人之旨。故春秋之言及是而光明。使庸人小童。皆可積學以入聖人之道。傳聖人之教。是其德豈不侈大矣哉。先生字某。既讀書。得制作之本。而獲其師友。於是合古今。散同異。聯之以言。累之以文。蓋講道者二十年。書而志之者又十餘年。其事大備。為春秋集注十篇。辯疑七

篇微指二篇明章大中發露公器其道以生人為主以堯舜為的苞羅旁覓膠輅下上而不出於正其法以文武為首以周公為翼揖讓升降好惡喜怒而不過乎物既成以授世之聰明之士使陳而明之故其書出焉而先生為巨儒用是為天子爭臣尚書郎國子博士給事中皇太子侍讀皆得其道刺二州守人知仁永貞年侍東宮言其所學為古君臣圖以獻而道達乎上是歲嗣天子踐祚而理尊優師儒先生以疾聞臨問加禮某月日終於京師某月日葬於某郡某里嗚呼先生道之存也以書不及施於政道之行也以言不及觀其理門人世儒是以增慟將葬以先生為能文聖人之書通於後世遂相與謚曰文通先生後若干祀有學其書者過其墓哀其道之所由乃作石以表碣

註釋

五家

左氏公羊穀梁氏夾氏

啖助

字叔佐有春秋集傳

膠輅

輅音昌驅馳喧雜也

唐故御史周君碣

有唐貞臣汝南周氏諱某字某以諫死葬於某貞元十二年柳宗元立碣於其墓左在天寶年有以諂諛至相位賢臣放退公為御史抗言以白其事得死於墀下史臣書之公之死而佞者始畏公議於序古之不得其死者衆矣若公之死志匡王國氣震姦佞動獲其所斯蓋得其死者歟公之德之才洽於傳聞卒以不試而獨申其節

猶能奮百代之上。以為世軌。第令生於定哀之間。則孔子不曰未見剛者。出於秦楚之後。則漢祖不曰安得猛士而存。不及興王之用。沒不遭聖人之歎。誠立志者之所悼也。故為之銘。銘曰。忠為美道。是履諫而死。佞者止。史之志。石以紀。為臣軌兮。

註釋御史周君

周子諒也。彈宰相牛仙客。觸上怒。杖朝堂。

賢臣

明皇相仙客罷。裴耀卿。張九齡。

表銘碣誄

唐相國房公德銘之陰

天子之三公稱公。王者之後稱公。諸侯之入為王卿士。亦曰公。有土封。其臣稱之曰公。尊其道而師之。稱曰公。楚之僭。凡為縣者皆曰公。古之人。通謂年之長老曰公。故言三公。若周公召公。王者之後。若宋公。為王卿士。若衛武公。號文公。鄭桓公。其臣稱之。則列國皆然。師之尊。若太公。楚之為縣者。若葉公。白公。年之長老。若毛公。申公。涪公。而大臣罕能以姓配公者。雖近有之。然不能著也。唐之大臣以姓配公最著者曰房公。房公相玄宗。有勞於蜀。人咸服其節。相肅宗。作訓於岐。人咸尊其道。惟正直慈愛。以成於德。用是進退所居而事理辯。所去而人哀號。理哀人哀。人不勝其懷。為文士趙郡李華銘公之德。亂故不克立。今制史太原王涯。嘉公之道。猶在乎人。人不忘公之道。為之刻石。且曰。州之南有亭曰需宴亭。公之為也。人之思也。乃增飾棟宇。即

而立焉。州人大悅。咸會。隕涕。言曰。昔公以周召之德。微子之仁。有土封以為卿士。道為三公。德為國師。年為元老。嘗為縣。縣懷其化。至於州。州濡其澤。凡我子孫。罔不戴慕盛德之詞。文而不刻。更刺史數十。莫克興起。乃卒歸於王公。王公嘗以機密匡天子於禁中。承公之道。刺於我邦。由公之理。又能尊公之德。起遺文以昭前烈。則其入為卿士三公也。孰曰不宜。吾懼其去我也遽。願書於銘之陰。用永表於邦之良政。

唐故衡州刺史東平呂君誄

維唐元和六年八月日。衡州刺史東平呂君卒。爰用十月二十四日。藁葬於江陵之野。嗚呼。君有智勇孝仁。惟其能可用。康天下。惟其志可用。經百世。不克而死。世亦無由知焉。君由道州以陟為衡州。君之卒。二州之人哭者逾月。湖南人重社飲酒。是月上戊不酒。去樂會。哭於神所。而歸。余居永州。在二州中間。其哀聲交於北南。舟船之下。上必呱呱然。蓋嘗聞於古而覩於今也。君之志與能。不施於生人。知之者又不過十人。世徒讀君之文章。歌君之理行。不知二者之於君其末也。嗚呼。君之文章宜傳於百世。今其存者非君之極言也。獨其詞耳。君之理行宜及於天下。今其聞者非君之盡力也。獨其跡耳。萬不試而一出焉。猶為當世甚重。若使幸得出其什二三。巍然為偉人。與世無窮。其可涯也。君所居官為第三品。宜得謚於太常。余懼州史之逸其

辭也。私為之誄以志其行。其詞曰。

麟死魯郊。其靈不施。濯濯夫子。故繫其儀。冠仁服義。干櫓書詩。忠貞繼佩。智勇承基。跨騰商周。堯舜是師。道不勝禍。天固余欺。鬼神齊怒。妖孽咸疑。何付之德。而奪其時。嗚呼哀哉。命姓惟呂。勤唐以力。輔寧萬邦。受胙爾國。維師元聖。周以降德。世征五侯。伊祖之則。嗣濟厥武。前書是式。至於化光。爰耀其特。春秋之元。儒者咸惑。君達其道。卓焉孔直。聖人有心。由我而得。敷施變化。動無不克。推理惟公。舒文以翼。宣於事業。與古同極。道不苟用。資仕乃揚。進於禮司。奮藻含章。決科聯中。休問用張。署讎百氏。錯綜逾光。超都諫列。屢阜其囊。帝殊爾能。人服其智。戎悔厥禍。歟邊求侍。盛選邦良。雖乎始使。君登御史。贊命承事。風動海壖。皇威以致。來總征賦。甲茲郎吏。制用經邦。時推重器。諸臣之復。用官匪易。漢課牋奏。鮮云能備。君自他曹。載出其技。筆削自任。羣儒革議。正郎司刑。邦憲為貳。紂佞肅邪。諂諛具畏。遷理於道。民服休嘉。恩疎若昵。惕邇如遐。實閉其閤。而撫於家。載其愉樂。申以舞歌。賦無吏迫。威不刑加。浩然順風。從令無譁。繇蠶外邑。我繭盈車。雜耕隣邦。我黍之華。既字其畜。亦藝其麻。鼙鼓斯屏。人喜其多。始富中教。興良廢邪。考績既成。王用興嗟。陟於嶽瀆。言進其律。號呼南竭。謳謠北溢。欺吏悍民。先聲如失。逋租匿役。歸誠自出。兼并既息。罷羸乃逸。惟昔舉善。

盜奔於隣。今我興仁，化為齊人。惟昔富人，或賑之粟。今我厚生，不竭而足。邦思其弼，人戴惟父。善胡召災，仁胡罹咎。俾民伊祐，而君不壽。矯矯貪凌，乃康乃茂。嗚呼哀哉！廩不餘食，藏無積帛。內厚族姻，外賙賓客。恒是懸罄，連茲易簀。僮無山服，葬非舊陌。嗚呼哀哉！君昔與余，講德討儒。時中之奧，希聖為徒。志存致君，笑詠唐虞。揭茲日月，以耀羣愚。疑生所怪，怒起特殊。齒舌嗷嗷，雷動風驅。良辰不偶，卒與禍俱。直道莫施，嘉言罔敷。佐王之器，窮以郡符。秩在三品，宜謚王都。諸生羣吏，尚擁良圖。故友咨懷，累行陳善。是旌是告，永永不渝。嗚呼哀哉！

故永州刺史崔君權厝誌

博陵崔君，由進士入山南西道節度府，始掌書記，至府留後，凡五徙職，六增官。至刑部員外郎，出刺連永兩州。未至永，而連之人懇君御史，按章具獄，坐流驩州。幼弟訟諸朝，天子黜連，帥罷，御史小吏減死投之荒外。而君不克復。元和七年正月二十六日卒。孤處道洎守訥，奉君之喪，踰海水，不幸遇暴風，二孤溺死。七月某日，柩至於永州。八月甲子，藁葬於社壇之北四百步。崔氏世嗣文章，君又益工。博知古今事，給數敏辨，善謀畫。南敗蜀虜，西遏戎師，其慮皆君之自出。後餌五石病，瘍且亂，故不承於初。今尚有五丈夫子，夫人河東柳氏，德碩行淑。先崔君十年卒，其葬在長安東南少

陵北君以竄沒家。又有海禍。力不克祔。三年將復故葬也。徒志其一。二大者云。鯢為祖。畢為父。世文儒。積彌厚。簡其名。子敬。字年五十。增以二。葬相溼。非其地。後三年辭當備。

唐故萬年令裴府君墓碣

公諱瑾。字封叔。河東聞喜人。太尉公諱行儉。實高祖侍中公。諱光庭。實曾祖。刑部員外郎府君諱稹。實祖。大理卿府君諱儼。實父。公由進士上第。校書崇文館。飭館事。修整左春坊。由是立署局。後參京兆軍事。按覆校巡。大尹恒得以取直。為太常主簿。搜逖疑互。探抉遞隱。宿工老師。不得伏匿。皆來會堂下。耆股肱。役喉喙。以集樂事。作坐立二部伎圖。卿奇其績。奏超以為丞。司空杜公聯奉崇陵豐陵禮儀。再以為佐。離紛紜。導滯塞。關百執事。條直顯遂。司空拱手以成。自開元制禮。諱去國恤章。累聖陵寢。皆因事擘。黯綴取一切。乃已有司。卒無所徵。公乃撰二陵集禮。藏之南閣。轉殿中侍御史。仍拜尚書比部員外郎。會校成要。要平聲月計曰會暮歲畢具。刺金州。決高施。墮去人水禍。渚芟原茅。闢成稻梁。陟萬年令。叢劇辦肅。談宴終日。人視之若居冗官。然會金州猾吏來。揚言恐喝。以煩褻事。曰不得三十萬。吾能為禍。公大怒。召罵之。恣所為。吏巧以聞。御史按章具獄。再謫道州循州。為佐掾。會赦。量移吉州長史。元和十二

年七月日病。店泄卒。始公以唯諾聞。長安中。奔人危急。輕出財力。如索水。火性開。湯進。交大官。不視齒類。挾同列。收下輩。細大畢。歡喜博奕。知聲音。飲酒甚少。而工於紉。謠舞擊。罌。織。屑。促。密。皆。曲。中。節。度。而。終。身。不。以。酒。氣。加。人。晝。接。人。事。夜。讀。書。考。禮。收。摺。策。牘。未。嘗。釋。手。以。是。重。諸。公。聞。初。娶。范。陽。盧。氏。無。子。後。夫。人。柳。氏。德。為。九。族。冠。生。三。男。子。喪。其。二。焉。貞。元。十。六。年。某。月。日。卒。祔。於。長。安。御。宿。之。北。原。冢。子。銑。奉。柩。以。明。年。月。日。克。葬。於。墓。銑。以。文。書。來。柳。州。告。其。叔。舅。宗。元。願。碣。於。墓。左。則。涕。為。之。銘。其。辭。曰。

有鬱其馨。惟裴之卿。世服大僚。仍耀烈名。封叔申之。實惟其英。讎書宮闈。佐職於京。太常命吏。以能增秩。相儀考禮。大弁法也斯畢。鳩工展伎。爰備聲律。或圖或書。藏之府室。史於柱下。郎於會司。徵循以周。大比是宜。作牧於金。金人允懷。溝防漢許。墊沃卒移。增我歲食。易其芋魁。游手閒民。相顧聚來。徵為萬年。治劇於都。百務敘成。談宴以娛。誰恤誰恃。不忍悍吏。胡巧其辭。按章以遂。由道斥循。施施三年。更赦進資。廬陵是遷。人曰世德。宜慶於延。又曰良能。宜力之宣。朝有大賚。期賜其還。鬼神不享。命隕在前。長原有墓。高曾祖父。淑靈是祔。封叔爰歸。左右惟具。孤銑磨石。祈辭海陬。遂升其趺於道之周。

誌

唐故中散大夫檢校國子祭酒兼安南都護御史中丞充安南本管經略招討

處置等使上柱國武城縣開國男食邑三百戶張公

張舟墓誌銘

漢光中興馬援雄絕域之志晉武一統陶璜布殊俗之恩理隨德成功與時並今皇帝載新景命丕冒海隅時惟公祗復厥績交趾之理續於前人公諱某字某某郡人也曾祖彥師朝散大夫尚書駕部郎中祖瑾懷州武德縣令考清朝議郎試大理寺丞贈右贊善大夫咸有懿美積為餘慶公以忠肅循其中以文術昭於外推經旨以飾吏事本法理以平人心始命蘄州蘄春主簿句會敏給厥聲顯揚仍以佐領軍衛兵曹為安南經略巡官申固扞衛有聞彰徽轉金吾衛判官三歷御史績用弘大揚於天庭加檢校尚書禮部員外郎換山南東道節度判官復轉郎中為安南副都護賜紫金魚袋充經略副使遷檢校太子右庶子兼安南都護御史中丞充本管經略招討處置等使公自為吏習於海邦凡其比較勤勞利澤長久去之則夷獠稱亂復至而寇攘順化及受命專征得陳嘉謨誓拔禍本納於夷軌乃命一其貢奉平其斂施牧人盡區處之方制國備刑體之法道阻而通百貨地徧而具五人儲待委積師旅無虞矣之呼繕完板幹控帶兼戊己之位文單環王怙力背義公於是陸聯長轂海

合艤艗再舉而克殄其徒廓地數圻以歸於我理烏蠻酋帥負險蔑德公於是外申
皇威旁達明信一動而悉朝其長取州二十以被於華風易皮弁以冠帶化姦宄為
誠敬皆用周禮率由漢儀公患浮海之役可濟可覆而無所恃乃創連鳥以闢坦途鬼
工來并人力罕用沃日之大束成通溝摩霄之阻若為高岸而終古蒙利公患疆場
之制一彼一此而不可常乃復銅柱以為正制鼓鑄既施精堅是立固圉之下明若
白黑易野之守險逾丘陵而萬世無虞奇琛良貨溢於王府殊俗異類盈於藁街優詔
累旌其忠良太史嗣書其功烈就加國子祭酒封武城男食邑三百戶凡再策勳至
上柱國三增秩至中散大夫某年月薨於位年若干天子震悼傷辭有加明年其孤
某官與宗人號奉裳帷率其家老咨於叔父延唐令某卜宅於潭州某原葬用某月
某日人謀皆從龜兆襲吉乃刻茲石著公之閼以志於邱墓以告於幽明銘曰
周限荆衡秦開百粵交州之治炎劉自設德大來服道消自絕伏波南征漢威載烈
宛陵北附晉政爰發我唐流澤光於有截皇帝中興武城授鉞肅肅武城惟夫之哲
更歷毗贊顯揚彰徹既受休命秉茲峻節度其謀猷守以廉潔厚農薄征匪貊匪桀
通商平貨有來肯悅踐山跨海堅其鶴列制器足兵潰茲蟻結烏蠻屈服文單剪
滅柔遠開疆會朝天闕銅柱乃復環山以砮海無遘迕寇罔踰越琛賁之獻周於窮

髮帝嘉成德載旌茂闕增秩策勳土封斯裂位厄元侯年虧大耋邦人號呼夷裔悽咽卜葬長沙連岡啟穴書銘薦辭德音罔缺

註釋

庚癸見左傳

戊己

漢元帝置戊己二校尉

文單環王

單夷姓環王本林邑元和四年連烏環王寇安南舟敗之拓地千里

山鶴列

陳兵也見列子

唐故邕管經略招討等使朝散大夫持節都督邕州諸軍事守邕州刺史兼御

史中丞賜紫金魚袋李公

李位

墓誌銘

公諱某字某實惟文皇帝之玄孫別子曰承乾為皇太子以藩愛逼奪危慄致禍後封恒山為愍王贈荊州大都督繼別曰象斬春郡太守贈越州大都督郇國公太宗曰玼太子詹事贈秘書監生虞尚書左丞凡四代有土田居貴仕公丕承之以率南服克荷天休繼有功德公始以通經入崇文館登有司第選同州參軍入佐金吾衛進太僕主簿參引大駕府移為左右神策行營兵馬節度以為推官拜監察御史賜緋魚袋凡二使其率皆范司空希朝進殿中侍御史湖南都團練判官以寬通簡大輔治得中道府遷主後事師人愛慕欲以貞元故事為請公恐懼抑留復從浙東為都團練副使轉侍御史又從浙西如其職加著作郎凡三使其率皆薛大夫革刺岳信二州得劉向秘書以能卒化黃白日召徒試術為離家上變就鞠無事勅答殺告